

כנר
DISPUTATIO PHYSICA,
De


Magis tempestates
cientibus,

Qvam,
Favente Supremi Numinis Gratiâ,
SUB PRÆSIDIO
VIRI

Præcellentis atq; Præclarissimi,
DN. M. JOHANNIS MÜLLERI,
Facultat. Philos. Adjuncti,
Fautoris atque Amici sui honoratissimi,
publicè pro virili defendet

Gottlob Freygang /
Elstrâ - Lusatus,

Ad diem XI. Octobr. Anno M DC LXXVI.



WITTENBERGÆ,
Literis MATTHÆI HENCKELII, Acad. Typogr.

Handwritten text, likely a title or address, mostly illegible due to fading.

Handwritten text, possibly a name or date, mostly illegible.

Handwritten text, possibly a name or date, mostly illegible.

Handwritten text, possibly a name or date, mostly illegible.

Handwritten text, possibly a name or date, mostly illegible.

Handwritten text, possibly a name or date, mostly illegible.

Handwritten text, possibly a name or date, mostly illegible.



DEUS adsit conatibus nostris !

ΆΙΩΝ ΠΡΟΟΙΜΙΑ.

§. I.



Disvasisse sibi *Veneficas* & *Satellites Satanae*, se *pluvias*, *grandines*, *tonitrua*, *ventos aliasq; tempestates* ciere posse, quibus *fruges* perdant, & *alia mala hominibus & creaturis aliis* inferant, nemo est, qui ignoret. Disputare igitur cœperunt Viri eruditi, *utrum etiam reverà tale quid præstent Saga, an verò mera sint prestigiæ & ludibria?* Ac fuerunt multi, qui planè *negârunt*, veras tempestates à magis excitari: ex quorum schola cumprimis *Seneca lib. 4. Natural. Quæst.* ita dicit: *Rudis adhuc Antiquitas credidit, imbres cantibus attrahi & repelli: quorum nihil posse fieri, tam palam est, ut hujus rei causâ nullius Philosophi intranda Schola sit.* Idem ferè censent recentiorum quidam cum *Wiero lib. 3. de Præstig. Daemonum cap. 16. Godelmannus in tract. de Veneficis, Ponzinibius in tractat. de Lamiis, Ulricus Molitor in tractat. de Pytho, mulier. & alii: causam assignantes, quòd ab Homine ne una quidem gutta aquæ produci possit: item quòd impiè Dæmoni ea adscribantur, quorum, utpote pruinae, grandinis, pluviae & similium origo Deo tribuatur in Scriptura.*

§. II.

Speciatim nunc libet audire *Wierum*, qui ita loco citato ait: Singulari insuper ratione in aëre concitando illuduntur hæ anicula (veneficæ) à Diabolo, qui simul atque ex Elementorum motu & natura cursu, citius faciliusq., quàm Homines, mutationem aëris & tempestatem fore prævidet, vel alicui infligendam ex abstrusa Dei voluntate plagam, cujus ad ipsum spectet executio, intelligit; tunc harum muliercularum mentes agitat, variisque imbuat imaginibus & suggestionem multiplici, quasi ob invidiam in proximum, vel ob vindictam adversus inimicum sine aërem turbaturæ, tempestates excitaturæ, & provocaturæ grandines. Itaq; eas instruit, ut varia deliramenta efficiant, quibus excitari posse tempestates credant. Atque ut ætius eas Satan illaqueet, diem & horam sibi notat præfigit. Cum verò successum hæ vident, nimirum quascunque desideratas in aëre tempestates, magis confirmantur, quasi eventus hic subsequatur ipsorum operationem, quâ ne aquæ quidem stillam elicere possunt. Hæc ille. Nonnulli censent, Diabolum illudere tantum sensibus Sagarum & aliorum hominum, ut tempestates se videre aut audire putent, cum minimè videant vel audiant.

§. III.

Contrà autem alii adfirmant, verè tempestates à Magis citari posse. Adducit hujus Sententiæ Defensores plurimos *Petrus Binsfeldius in tractat. de Malef. lib. 4. qu. 4. citatus ob id à Martino Delrio Disquisit. Magicar. lib. 3. qu. 11. pag. 137. f. a.* Possent & ex novis Scriptoribus pro parte affirmativa aliqui produci, si opus foret. Nobis sufficiat hæc vice, nominasse unum *B. Sperlingium*, qui in *Synopsi Physica pag. 83. ad Magiam Dæmoniacam* (non Præstigiatoriam, sed) Effectoriam hoc refert, quando Sagaræ per tempestates illatas fruges perdunt. Addi tamen etiam possunt *Schottus in Physica curios. libr. 1. cap. 34. p. 160.* *Ludovicus Willichius im Zauber Teuffel c. 19. pag. 223.* *David Mederus in den Heeren Predigten Conc. 5.* His igitur & nos calculum nostrum addimus.

§. IV.

§. IV.

Non tamen simpliciter illud affirmamus, sed meritò certas *limitationes & cautelas* addimus. Ante omnia igitur constat, *Sagas tempestates moturas & grandines provocaturas varia verba, ritus & ceremonias* adhibere. Sic quandoque *silices* post tergum occidentem versus projiciunt, aliquando *arenam aquæ torrentis in aërem* conjiciunt. Plerumque *scopam in aquam* intingunt, *cælumque* versus ipargunt, vel *fossulâ factâ lotium aut aquam* illuc effusam digito aut baculo circumagitant. Subinde *in olla porcorum pilos bulliunt* : nonnunquam *trabes vel ligna in ripa transversè collocant*, & id genus alia deliramenta efficiunt. *Vid. Wier. loc. cit. De Cianitis Indis* refert, *Delrius ex epistolis anno 1590. & 1591. ex Peruvia scriptis*, quòd pluviam indigentes ridiculum huncce ritum observent. Nimirum Magus quidam magnâ vocis contentione & acceleratione clamat, ut omnes ad montem certum concedant, quò postquam pervenerunt, ut quilibet consveto more à cibis abstineat. (Est autem eorum hoc jejunium ; ut à sale, pipere, cibisque coctis se contineant.) Quod ubi factum est, voce intensâ & clamore summo *stellas invocant*, aquamque precantur, & ad terras castellumque paganum sese vertunt, portionem quandam in manibus tenentes : quam ubi nobilis alicujus adolescentulæ manu porrectam ebiberint, ita à sensibus abducuntur mentisque impotes fiunt, ut mortui videantur. Sed ubi in se redierunt, mel aquâ & maizo miscent, quibus permixtis *nubes aspergunt*. Die sequenti nobilem aliquem, aut conspicuum & venerandum quempiam Senem in lectum deponunt, subjecto lento igne, atque ubi sudare cœperit, sudorem vase excipit Magus, anserino sanguini admiscet, atque ex radice expressa aqua rursum in aëra jactat, *nubes ut tingat* ; rogat per sudorem, sanguinem & aquam, ut desideratam pluviam largiantur. Quòd si casu ea die, quâ sunt superstitiosi, pluat, gratias agunt stellis, magumque multis muneribus efferunt.

§. V.

Nicolaus Remigius lib. 1. Demonol. cap. 25. scribit, Sagas acceptâ à Dæmone virgâ tantisper verberare aquas, usque tum vapores fumosque abunde excitent, quibus cum unâ sublimes efferantur. Illud deinde, quod sic esset excitatum, se in nubes densas & caliginosas induere: quod, postquam unâ cum Dæmonibus ei essent involutæ, agerent pellerentque, quâ esset libitum, & tandem multa præcipitatum grandine in terras demitterent. Antequam autem, pergit ille, undam ita diverberant, aliquando in eam immittunt ollam fictilem, cui aliquid arcanum Dæmon includit, veletiam lapides tantæ magnitudinis, quantam volunt grandinem decidere. Interdum candelas inversas super stagnum tenent, donec guttæ defluant: aliâs pulverem medicatum in aquas spargunt. Ad diverberandam autem aquam ut plurimum virgis nigris à Diabolo datis utuntur, & his constantissimè aquam flagellant, & diras simul verborum execrationes ingeminant. Addit verò, hoc ipsum plus minus ducentos Homines, qui ipso inquisitore & duum viro damnante incendio crimen sortilegii luerint, confesos esse. Hic ipse Remigius loco eodem narrat, quòd in Ditione Trevirensi rusticus fuerit, qui cum filiola sua octenni cautes plantaverit in horto. Filiam fortè collaudavit, quòd aptè hoc munus obiret. Illa sexu & ætate garrula, se nosse alia facere magis stupenda, jactat. Pater, quid foret, sciscitatur. Secede paululum, inquit, & in quam vis horti partem, subito imbrem dabo. Miratur illa Pater, age, secedam, ait: quo recedente scrobem puella facit, in eam de pedibus aquam (ut cum Hebræis pudentiùs loquar,) fundit, eamque bacillo turbidat, nescio quid submurmurans: Et ecce tibi subito pluviam de nubibus in conditum locum. Quis, inquit obstupefactus Pater, hoc te docuit? mater, respondet, hujus & aliorum similium peritissima. Plura hujus generis vid. apud Remig. Delrium & Schottum.

§. VI.

§. VI.

Has verò ceremonias, hos ritus nos censemus nihil ad rem facere atque conferre. Unde enim probabitur, per has ineptias elici tempestates posse? Sanè is, cui causæ tempestatum notæ sunt, nunquam ridiculis istis gestibus aliquid circa originem tempestatum tribuet. Adde, quòd multa ex istis meram quantitatem sapiant. Ast quantitatis & eorum, quæ quantitatem aliquam inferunt & sapiunt, qualia sunt verba, characteres, circuli, inclinationes &c. nullam esse efficaciam, alibi ostenditur. Dicendum itaque, Cacodæmonem instigare miseros illos homines, ut talia media in se inefficacia adhibeant, ac persuadere iis, quòd vi maximâ ad producendas tempestates polleant, ut scilicet eos faciliùs in superstitione, cui se semel mancipârunt, & sub potestate sua, cui se subjecerunt, conservet.

§. VII.

Solemne enim hoc est Diabolo, dementare atque excæcare sua mancipia, ut credant, variis verbis, ceremoniis, ritibus, circulis, characteribus & similibus ineptiis maximas res geri & perfici posse. Unde his omnibus virtutem summam in variis rebus, ab iis, qui Satanæ laqueis constricti sunt, tribui quotidie videmus. Sic exempli causâ verbis morbos sanari posse perhibent. De Epilepsia versiculi sequentes in aprico sunt:

Caspar fert Myrrham, thus Melchior, Balbasar aurum,

*Hæc tria qui secum portârunt munera Regum,
Solvitur à morbo Christi pietate caduco.*

Febrim curari ajunt, si quis manum laborantis apprehendat, & hæc verba recitet: Æquè facilis tibi hæc sit febris, atque Maria Virgini Christi partus. Dolorem dentium tol-
li,

li, ajunt, recitatione verborum : *Os non comminuetis ex illo.* Aut etiam si à collo suspendantur hæc verba : *strigiles falcesque dentata, dentium dolorem persanate.* Vid. *Beat. Sperlingium Institut. in cap. de Magia. qv. 1. Sanguinem è naribus profluentem fisti* posse his rythmis credunt : *Sanguis mane fixus, sicut Christus pro te crucifixus : Sanguis mane in venis, sicut Christus pro te in pœnis ;* quæ verba etiam *Fernelius lib. 2. de abditis rerum causis* adprobat.

§. VIII.

Ita etiam opinantur, verbis, figuris, characteribus, imagunculis, ceremoniis, speculis, cribro & aliis morbos inferri, res furto amissas recuperari & alia plura præstari posse. Referunt, in imagine cerea aliave assari aliquem posse, configi, item surdum, paralyticum, cæcum, claudum, impotentem ad Venerem reddi : nullum item morbum posse nominari, qui non tollatur aut arietis sigillo, aut tauri, aut geminorum, aut aliorum Zodiaci signorum. Quando Sagæ ad sua conventicula cupiunt transportari, tunc primò inclinationes certas præmittunt, circulosque aliquos faciunt. Deinde adhibent unctionem ex variis rebus insulsis confectam, quâ inungunt crura, aut baculos, scopas, aliave instrumenta, quibus transvehuntur, aut saltem transvehi se credunt. Denique pronuntiant verba hæc : **Oben aus / und nirgend an.** Plura adducere nolo, cum adduci alias magna in copia possent. *Sed ubique fraus Diaboli subest*, uti angvis latet in herba. Si sequuntur hos ritus veri effectus, sunt illi à Diabolo *μυριτερων* & *κακῶρων*, non autem ab istis vocibus & ceremoniis.

§. IX. Por-

§. IX.

Porro dicimus, (ut ad rem iterum perveniamus,) *Sagas & Magos nunquam solos & proprio Marte ejusmodi Meteor-
ra posse ciere*; sed semper ad ea excitanda requiri *concursum
& auxilium Diaboli*. Quia autem ipsius etiam Diaboli
potentia ita à DEO est limitata, ut sine ejus voluntate n-hil
planè possit perficere, ideo addimus ulterius, *semper DEI
permissionem debere accedere*. Etenim solus DEUS Tempe-
states in sua potestate habet, easq; regit pro sua voluntate.
Inde etiam sacer codex, quoties de Tempestatibus agit,
DEUM autorem earum facit. *Ipsè dat viam procellis sonan-
tibus*, ait *Jobus cap. 28. vers. 26.* *Dat vehementissimum imbri
cursum, & viam sonanti tonitru, mittit fulgura, & eunt, i-
dem inquit, cap. 38. vers. 25.* *Ipsè pluvia pater est, ibid. vers.
28.* *Ad vocem suam dat multitudinem aquarum de cælo*, re-
fert *Jeremias cap. 10. vers. 13.* Plura vid. ap. *Balduin. in Cas.
Consc. lib. 3. cap. 5. Cas. 9. pag. 747.* Quare nec Diabolo,
nec mulieri alicui, aut alteri ministro Satanæ inest facultas
pro lubitu de tempestatibus constituendi. Et certè si esset,
nos omnes jamdudum periissemus. Elegans hujus rei
exemplum prostat in *historia Jobi*, (de quâ postmodum re-
feremus,) cujus liberis & pecudibus per tempestates Sata-
nas nocere hautquaquam poterat, nisi priùs eam veniam à
DEO impetraret. *Conf. Job. cap. 1.* Si autem DEUS permit-
tat Diabolo, ut agat, quod ipsi lubet, tum ipse, & ipsius au-
xilio ministri ac ministræ ejus sine difficultate movere &
ciere Meteora possunt.

§. X.

Nec diffitemur tamen, (ut & hoc addamus,) *quòd sub-
inde ludibria Diaboli subsint*. Nam dum *Diabolus*, qui in
rebus *Physicis peritissimus* est, prævidet è causis naturalibus
futuram verbì gratiâ pluviam, *Sagas & Lamias* sæpe insti-
gat, ut ritus ex pacto constitutos adhibeant, scilicet herbas

certas coquant, characteres scribant, aquam scrobi à se effossæ infundant, verbis & gestibus certis utantur, illisq; sic persuadet, ipsarum operâ id contigisse, ut tempestas oriretur. Sicut nec illud negamus, *Dæmonem interdum meris præstigiis homines ludere.* Facile nempe Diabolo est, facile ejus servis, glaucoma oculis hominum objicere & sensus eorum pervertere. *Perstringit Diabolus,* ait B. Lutherus in Gal. cap. III. *tam vehementer omnes sensus, ut miseri homines putent, se audire, videre aut tangere aliquid, quod tamen non vident, audiunt vel tangunt.* Quis nescit, ita interdum dementari homines à Satana, ut credant, se bruta esse, credant adstantes alii, cum tamen veri homines maneant? Alia exempla prætereo. Tales ludos etiam circulatorum nonnunquam spectatoribus suis exhibent.

§. XI.

Causæ verò omnium tempestatum *sidera* sunt, quæ modò hæc, modo alia Effluvia ex terra & aquis extrahunt: unde nunc pluvix, nunc venti, nunc fulmina, nunc alia sunt. Nam quod concernit verbi causa *pluviam*, ibi stellæ ex aquis & locis humidis varios extrahunt vapores, qui, quando in mediam aëris regionem perveniunt, igne, propter frigiditatem illius regionis, privantur. Hinc magis & magis condensantur, inque aquam crassam mutantur. Hæc cum gravis sit, naturæ impetu decedit. Prout verò guttulæ aquæ, (quæ in orbem se cogunt, ut hosti externo, nempe

igni,

igni, fortiùs resistent,) magnitudine, frequentia & impetu variant, ita etiam pluvia magnæ & mediæ oriuntur. *Ventros* quod attinet, ibi peculiari aëtorum influxu spirituosæ ac flatuosæ effluvia è terris & aquis educuntur, quæ nunc infimam aëris regionem, nunc unà mediam agitant, & obvia, quæque concutiunt. In aliis par est ratio. *Conf. passim Physici, privatim B. Sperlingius in cap. de Effluviis.*

§. XII.

His ita suppositis, *nequaquam concedimus, Diabolum vel ei addictos aliquam in sidera habere potestatem*, ita, ut ea, sive sistere, sive retro agere, aut alio modo eorum cursum à DEO ordinatum impedire possint. Ita enim sequeretur, eos ordinem universi turbare posse, quod esset contra Providentiam Divinam. Unde non possum adfurgere sententiæ *Gentilium*, statuentium, *Lunam per veneficorum carmina de cælo posse detrabi*. Qua de causa pulsati aëris crepitu, sono cymbalorum excitato, & clamore elato, præ quibus scilicet non audirentur Magorum carmina, subveniebat laboranti Luminari simplex multitudo. Non enim magis consentanea rationi hæc fabula est, quàm recentior populi cujusdam rudis, opinantis, Lunam ab asino epotam, quia pecus Arcadicum de flumine biberat eo tempore, quo Luna nube velata videri desierat: Unde miserum Sileni vectorem in carcerem conjecerunt, & alvo ejus rescissa, ut Lunam mundo redderet, sævisimè eum exenterârunt. Videtur autem ejus origo hæc esse, quòd ignorarent causam deliquii Lunaris. *Vid. Plutarchus lib. de præcept. connubial. Ludov. Vives in Comment. ad lib. 10. Augustin. de Civit. DEI Demst. ad Antiquitat. Rosin. lib. 1. cap. 8.* Sed ferendi forsân sunt Gentiles. Qvis autem ferat *Poëtam Christianum*, sic canentem:

*Verba vel alto errantia cœlo
Sistere sidera, verba potentem
Noctis possunt ducere Lunam.*

§. XIII.

Ulteriùs dum tempestates à Diabolo & Lamiis cieri posse adserimus, non calculum addimus Bodino, *fulminum omnium Diabolum causam esse*, qui dixit. Cur sæpe, quærit ille, *ruptis flamma nubibus ingentia tonitrua exaudiuntur, sæpius tamen effractis & hiantibus fulgur tantum sine tonitruo emicat?* Respondet, cum cælum ita subito aperitur splendore, nullum argumentum majus esse, quo demonstrari possit, tonitrua non à fragore nubium, sed potius à quovis dæmonum excitari. Semper enim aliàs ruptis flamma nubibus tonaret, & sine nubibus tonitrua nunquam exaudirentur. Cum tamen utrumque sit falsum, quia & sine nubibus ullis cælo sereno tonitrua fiunt, & sæpius fræctis ab igne nubibus nulla tonitrua percipiuntur. Imò terribilissimum sulphuris odorem totum aërem infestare ibi, ubi decidant fulmina. Idq; certissimam significare præsentiam Daemonis. Ubique enim Demones cum Hominibus nefaria societatis fide copulantur, foedisimum semper relinquere sulphuris odorem; ac pingvem & fumosam exhalationem efficacissimum ad Daemonum actionem esse instrumentum. Vid. ejus *Theatr. Natur. lib. 2. p. 208.* A quo quidem non multum abit Johannes Baptista Helmontius, novus tum Physicæ, tum Medicinæ turbator, qui in *Orig. Meteor. pag. 74.* ita scribit: *Credo prorsus, Tonitruum causam omnem habere non supra, sed præter naturam.* Et alibi dicit: *Fragor sive vox tonitru est Cacodæmonis ingentis roboris effectus.*

§. XIV.

§. XIV.

Ast, Tempestates suas agnoscunt causas, & ex causis suis naturalibus progrediuntur. Nam *fulmina* ex effluviis sulphureis & nitrosis permixtis sunt. Sulphur flammam concipit, à qua abhorret nitrum, fugaq; sibi consulens strepitum edit. Conjuncta ista effluvia tamdiu se invicem tolerant, quamdiu sulphur non accenditur. Factâ verò inflammatione, mox sequitur fragor & violenta ignium ejectio. Fragor ex subita aeris percussione, ignium ejectio ex pugna. Res non aliter se habet, ac in pulvere pyrio. Hujus enim compositio est sulphure & nitro constat. Cum igitur sulphur, seu primum inflammabile, accenditur, tunc cum impetu fugit nitrum, vehementer turbat aërem, & sic cernitur corruscatio auditurq; sonus. Plenior hujus rei explicationem vid. ap. B. Sperlingium in Institut. Cap. de Meteoris Ignitis.

§. XV.

Distingvimus igitur, ut propius ad rem accedamus, inter *Causam moralem*, & *Physicam*. Hac, ut Metaphysici tradunt, est, quæ physicè influit in effectum, eumq; immediatè ac per suam Entitatem attingit. Illa, quæ quidem physicè non influit in effectum, nec illum per suam Entitatem attingit, actu tamen moraliter bono vel malo movet agens Physicum, ad effectum producendum, qui proinde ipsi imputatur, ac si physicè egisset. Ita ignis est causa Physica combustionis ædium: incendiarius causa moralis. Occidens hominem, causa Physica cædis est: impellens autem causa moralis. Dicimus igitur, quòd *Diabolus & Sage* in concitandis tempestatibus non sint causa Physica, sed tantùm morales. Non enim Physicè in tempestates influunt, aut eas immediatè

producunt; sed tantum actu morali malo circa eas versantur, ac Diabolus quidem, dum principia tempestatum jam in aëre prostantia conjungit, activa passivis applicat, & tandem totam massam in fruges, quas perdere cupit, aut in alium, in quem vult, locum derivat. Sagæ autem, dum Dæmonem ad id obligant, ut vi foederis, quod cum eo inierunt, ipsis in ciendis tempestatibus opituletur. Alias Causæ Physicæ hinc sunt DEUS, sidera, & Effluvia.

§. XVI.

His ita expositis, quantum satis esse censemus, sententia nostra stabilienda venit. *Probamus autem eam primo ex pacto Magorum & Magarum, quod cum Diabolo habent.* Omnes enim illos, sive Viri sint, sive foeminae, foedus aliquod cum Diabolo iniisse, constat ex variis effectibus praeternaturalibus, quos edunt. Est verò foedus sive pactum hoc vel *explicitum*, quando albe veneficorum nomina suadant, & DEO renunciant: contra Diabolo homagium præstant, ei que & corpora & animas suas tradunt. Hoc enim quandoque fieri, ex confessionibus Veneficarum patet. Vel est *implicitum*, quando absque foedere expresso artes Diabolicas exercent. *Conf. B. Sperlingius in Synopsi pag. 85. Et vid. B. Benedictus Carpzovius Prax. Criminal. p. 308.* Propter hanc igitur pactiorem, sive expressam, sive tacitam, Diabolus Magos opere in quocunque, quod ad contumeliam Divini Numinis & damnum hominum pertinet, adjuvare tenetur, imo vult libentissimè.

§. XVII.

Deinde probamus à *Diaboli potentia*. Non enim impossibile est Dæmoni, ignem ex aëre in terram instar fulminis dejicere, quò multa perdat & consumat. Non quòd
tunc

tunc aliquam supra aërem existentis partē defumtā demittat, nec enim ibi ignis datur, sed quod applicando activa passivis in aëre ignem accendat, ac deinde per motum localem deiciat. Potest etiā Satanas congregare in aëre & mittere in terram vehementissimos & turbulentos ventos, qui magna subvertant nonnunquam ædificia. Potest gravissimas in mari tempestates, aquas maris scilicet ab imo sursum commovendo per ventos alibi spirantes eò deductos, excitare. Potest quoque ingentes facere terræ motus, vel mittendo vehementem aliquem spiritum in cavernas terræ, vel inclusum in illis vehementiùs agitando.

§. XVIII.

Atque id non præter rem à nobis adferi, vel ex Sacra Historia constare porest. Certè cùm in *Historia Jobi* ignis de cœlo mitteretur, qui servos & pecora absumebat: cùmq; vehementissimus ventus irrueret in domum, filios & filias Jobi qui ruina opprimebat, Diabolus ea efficiebat. Nam dederat DEUS omnia, quæ Jobi erant, in manum Satanæ. vid. Job. cap. 1. vers. 12. 16. 19. Unde etiam malignus Spiritus princeps aëris appellatur *Ephes. 2. vers. 2.* non quasi aërem condiderit, sed quia aërem movet & turbat.

§. XIX

Denique sententiam nostram probamus & illustramus *Exemplis tempestatum à Magis excitatarum.* De ventis & tempestate data à Magis tempore Xerxis testatur *Herodotus Lib. 7.* De Finnis & Lapponibus scribit *Olaus Magnus Lib. 3. cap. 16.* eos olim mercatoribus ventos venales exhibuisse, tres nodos magicâ arte consecratos illis tradendo,

quorum

quorum primo soluto placidos ventos, secundo vehementiores, tertio vehementissimos essent habituri. De tribus Tartarorum hordis ultra Cazanense regnum habitantibus, narrat Alexander *Gvagvinus* in Tartaria esse supra modum deditos incantationibus, & ab iis caligines aliasque tempestates cœli frequenter excitari, hœcque modò Hostes profligari. Olim *Aristæus* docuit, incolas Cycladum, certis ritibus ac hostiis Etesias æstivo tempore elicere, & sic svavi frigore squalorem & sterilitatem ab agris arcere. De pluviis cœlo devocatis per Magos scribunt *Pausanias in Arcad. Dion. Cassius Lib. 56. Xiphil. in Annot. & alii*. Alia exempla recentiora mitto. Hic enim terminum dissertationi meæ figo.

SOLI DEO GLORIA.

